



廬山太平興國宮採訪真君事實序

夢當時使者之語以謂後五百年福及生靈以曆考之自開元辛未距今行及五百年矣元宗皇帝建祠以事而使者之名顯國朝累聖崇奉神宗皇帝虔進聖號徽宗皇帝加上寶冊而使者之位益重祀典益崇禮意益至殊祥異貺影從響答其在斯歟義問來九江適太守大卿胡公紘以清靜理郡政民神協從甲戌春舉行舊典以義問攝祀事于太平興國宮禮畢因觀山川之勝穹隆磅礴層見疊出不可名狀是宜高真之所慎擇也宮之道士有向師尚者清修自

持且有心於闡宗立教以使者應化之迹泯泯未傳
求義問編次義問不敢以鄙陋辭謹列于左方紹興
二十四年中元左朝奉郎通判江州軍州事兼管內
勸農營田事賜緋魚袋葉義問謹序

廬山太平興國宮採訪真君事實卷之一

分真初始類

考原

謹按

太上三天正法經云九天真王與元始天王俱生始
炁之先天光未明鬱結未澄混沌太虛浩瀚流冥七
千餘劫元景始分九炁肇存相去九萬九千九百九

十歲

青重君注爾時未有歲月九炁既有一歲清炁高
炁相去九萬九千九百九十九里為一歲

澄濁炁下布九天真王元始天王稟自然之炁故稱
九天之號九天司命者萬物受生之真宰也九天丈

人者象真景德之宗師也九天使者監御萬靈之貴
神巡察三界賞善罰惡之總司也又九天鳳炁元丘
大真書云太上丈人下授五嶽君却禍除殃其中曰
九天真王者伏千神使衆靈又南唐降現真圖記稱
使者真君有五號一曰九天真王二曰朱陵上帝三
曰火煉真人四曰南上真君五曰九天採訪使者
上帝錫之七映平華九德偃月金晨玉冠九光紅霄
飛雲金羅之帔曳紅霄碧觀海嶽之裳單衣羽襜朱
霞霄袞紅玉霄裙六華鉢衣躡元朱光之履飛紅單
舄執太元碧琳之圭瓊華翠簪佩九天採訪南上真

君使者金冊九元之劔五帝伏魔之印九天真王之
印採訪靈威攝邪之印授北極天帝五靈尊神吏兵
天丁之印五百靈官五帝三官三河四海五嶽四瀆
九江五湖十二河源溪女吏兵之印白鶴師子擁御
青龍白虎護衛六丁六甲使列左右九天仙女十二
溪真陳奏樂部扶桑大帝暘谷神王太極真人以爲
副從上三皇時下降爲九龍使者中三皇時爲九都
使者下三皇時爲元都使者黃帝時爲真元使者帝
堯時爲太清使者帝舜時爲九疑使者大禹時爲元
夷蒼水使者助禹治水成功周穆王時爲天靈使者

唐元宗皇帝時爲九天採訪使者九天在三十二天之上統九億萬諸天地人物應中國九宮九州九星分野太一之數以定災福大小運炁陽九百六之災臨諸分野各有天官靈官主司也生化人物天數甚多以九天配日月星宿照臨天下萬國九州八極十方世界天人祿壽筭數貴賤能鎮生化之源者即太上真元無極大道玉皇尊帝太上老君高居九天下臨真化故命九天真王受朱陵上帝爲使者威德備三清之法尊崇亞天帝之位採訪之權靈通應感著於聞見皆可考焉則知真王乃天中貴神所以分真宅靈下鎮洞天福地利澤邦家體虛皇以闡慈代昊天而示化累朝崇奉縉紳信禮士庶欽仰靈貺昭彰豈區區淫祀之比哉

見祥

元宗開元十九年二月十五日夜寢靈符殿夢神人仙仗甚盛語帝曰吾是九天使者被受混元正真玉帝太上老君勅命採訪九天元地三界十方萬國九州八極內外觀察巡遊較定天人祿壽生靈罪福建立採訪總司九天司命真君開治舒州潛山九天丈人真君開治蜀郡青城山吾今開治江州廬山可於

三山興置齋祠後五百年福及生靈言訖而覺明日
元宗宣諭羣臣時宰相張說奏言陛下夢且當春或
恐未審帝乃設案焚香至誠禱顙須臾雲鶴仙仗森
布含元殿前第見使者乘青龍之車靈姿妙粹瑞相
端妍帝爲虔拜使者以左手約之時見五百靈官九
江水帝十二溪真上清二十四位真人儀仗羅列百
官瞻望乃詔吳道子肖貌勅內供奉張奉國及法師
張平公等齋像詣江州命刺史獨孤正縣令魏昌建
祠於廬山之陰

宅靈

本宮係真君親擇勝地居廬山西北隅先是明皇遣
使搜訪山水佳處莫知適從舊傳有居民陳氏所居
平夷忽有道士踵門謂曰此地宜使者廟基汝盍捨
諸當獲靈佑陳曰願也第家貧不能遽遷耳道士曰
吾爲汝遷謹無費遷已汝身後爲此方土地言畢而
逝陳愕然是夜風雷大作及曉陳家于山之南崦矣
今宮之左有地主祠血食一方靈通昭著潯陽之義
門陳氏即其後也宮基正坐聖治峯前連引橫山在
巽天醫之方自民臨震乃得貪狼而歸玉兔生炁也
天醫主拯救生靈生氣主長養萬物道家以迴骸起

死爲功以度人濟物爲行真君宅之亦宜坐乙向辛
皆合天心左右龍虎蜿蜒盤踞互相揖抱十有二重
應十二辰大溪自巽入乾復回坤地別有小澗發源
聖治峯歷午未與大水合四面方位周流無間冬夏
不涸宮前案山名遊魚上水孤峙宮前有同朝禮外
案自瑞昌縣排列以至蘄黃二州環望數百里重疊
如屏障襟江帶湖如拱揖此宮也聖治峯特高於諸
峯左右羣峯千巒萬壘爲之輔翼南接虎溪福地康
真人道場葛仙翁鍊丹之井北跨詠真洞天董真君
種杏上昇之餘後有呂仙翁藥爐丹竈遺址存焉背
抵五老峯倚天青壁屏圍於外神人所居是豈偶然
者哉

應真

初元宗夢見使者云建祠之處自有木植但加工力
而已及中使至得地于聖治峯前別引橫山扶輿磅
礴迤邐而下如頓萬馬基甫定而巨木數萬隨水空
至隨用隨足工役之興常有神光如晝力作妄倦旬
月告成中使復夢神人曰粉堊丹綠此地有之待
他求鑿祠之此五色具備或云是材也昔九江王布
擬作宮殿之用沉埋湓浦以待今日吁異哉祠西長

廊在巨澗狀流之上水聲澎湃聞於地中其祠號九
天使者廟元宗御篆九天使者之殿六字南唐昇元
二年就祠改通元府山前今有府前市

本廟太平興國二年

太宗皇帝改為太平興國觀宣和六年

徽宗皇帝御筆改觀為宮

彭澤尉潘觀祥驗記其畧云建祠之初靈異有五
不雨不風水忽漂漲移棹近山水復仍舊一也丹
粉雜色穴出崖生私求者失路廟用者必獲二也
謝土之夕連宵風雲焚香告祈俄頃雲收風息祭
之日宇宙澄空會此良辰仙燈遠照三也彭蠡津
渡之處時有數百人求渡云我往廬山謁使者廟
汝載我當酬汝直渡已各留五錢經宿閱之錢乃
成紙乃知鬼神速來欽禮見斯瑞像以示於人四

也使者騎從龍君虎吏刻削取人或泥或木入廟
之後忽有數尊汗流霖霖沾濡其面仙靈所役其
汗交流稽驗具存人神匪別五也凡此
五事前世罕聞刻石紀之以傳來者

殿宇像設

九天採訪應元保運真君之殿

神宗皇帝御書後惟
兵火今乃王瑄恭書

朔採訪居中左右侍立金童玉女靈官各二六丁六

甲各六殿內兩壁畫上清太微二十四位真人殿外

兩壁左畫十二溪真右畫九江水帝三江大王皆倣

吳道子之本相貌奇古精神聳動殿前左防觀右護

法閣下驛龍金虎大將殿之左翼三官大帝殿右翼

四聖真君殿主廊左有道藏榜曰瓊章寶室

于湖張
孝祥筆

貯經五百二十八函計五千二百八十七卷外右有
九十九函奉勅禁隱不曾頒降係楊新主府捨

天師堂榜曰正一之殿紹興二十八年十月內恭奉

高宗皇帝特旨於採訪殿後新建大殿專一崇奉

皇帝御容本命賜名申福殿殿之右漳泉慈濟真君

殿殿之左三山澗靈澤龍王殿嘉泰四年勅紹定五

年初三清寶閣中塑九皇御座左脇樓九天丈人真

君像右脇樓唐元宗皇帝像嘉熙四年閏十二月內

理宗皇帝賜御書三清閣三大字脩廊左右各二十

五間左畫採訪真君自三皇五帝以至於今降現異

號右畫採訪真君自興置以來賞善罰惡習仙祈嗣

靈驗事蹟轉廊左右各五間畫五百靈官像天冠絳

服如朝謁儀相貌各異皆以次列係倣唐待詔院畫

亦近代奇筆也脩廊中有石壇三成左有磚閣五層

上安洪鐘榜曰景陽右有磚閣五層上塑朱陵大帝

榜曰朱陵兩轉廊之間為內三門榜曰紫元景曜之

門張于內亭榜曰詠真洞天張擣按舊記云得道劉

德本遇仙人從遊入詠真洞天所扁如此及見採訪

考校世人罪福而出階下有石一株舊記云有劉越

者從此出入康阜真人赴劉約叩此石而入會于洞

府今有亭曰劉仙石此外為外三門曰太平興國之

宮

徽宗賜書後羅兵門接度仙橋松杉蒼鬱徑皆

石甃有亭臨驛路榜曰天下太平亦榜大殿後有道

紀堂吳說蓮池蓮會堂抱一堂易山虛室紫溪真泡

泉雲無心堂始因清虛皇甫居此于湖隸書取義

後皇甫遷居本宮鉢聽雨軒屬屏跨碧橋何師御書

碑亭中藏石刻御書勅黃省刻附焉左右兩山道院共

三十餘所依山傍水窻戶玲瓏誦聲琅然內有希微

堂今葆清是也有墨仙泉因洞廣天籟堂東坡留題

石于壁間老圃堂山谷紀葆真菴方壺梅竹幽邃眼

界清楚揮寫題極多其如真一卷鏡泉寒碧軒留

雲閣冷翠閣名勝翰墨具在詩集宮後有靈澤龍湫

上中下三潭一潭在高崖絕壁之中嶮不可攀中下

兩潭可往來祈禱樵者常見龍戲味每雲起時山前

人望龍附仙人誦經臺有一石突出如經案樣四邊

樵者聞誦飛雲洞洞中可坐二三十人又有一竅隱

雲起則雨雲聚則晴山宮前有祝

聖放生池積金池左右龍虎環抱松風蘿月清流奇

石負隔人境真天下形勝福地

蓮花會

唐自建祠宇以後選差道士蔡仙覺孟仙真吳太清
歐陽法明凌知隱焚脩香火越明年八月朔致醮落

成是日江淮間士庶羞艾緇素之徒不約而集者數
千人慶成齋醮晝夜不絕時蓮花盛開朝謁者各捧
一花爲供爭置殿陛之下喜相告曰此會殊勝蓋命
爲蓮花會普歲以此日同會于此祈年穀穰疢癘庶
幾使者垂佑錫美以福我衆萬口一辭再拜而去
出舊記

採訪行

江東憲周彥質作

君不見開元天子全盛時高拱昭曠居無爲人神和
協天意得太史按諜書龐禧六宮深鑱青春夜新月

朦朧照臺榭金鈴不曳禁直閑宸慮澄清鎮多暇嬪
璫衛宿昭陽宮時聽禁鼓鳴丁鼗恍然帝夢見神物
千幢萬纛來虛空陰雲滌蕩天衢碧風伯兩師親執
職天地水府神官從後導前驅齊衛翼金車龍御雲
中央穆穆天表端圭璋霓旌鳳蓋颺晴影縹緗鸞珮
聲琅琅爭傳天語青冥上低詒神都駐仙仗自言帝
命有司職領使九天躬採訪側聞廬阜窮幽清願寄
一畝營官庭慇懃禱祀五百年自有至福覃生靈銀
箭頻更春漏短清寐忽隨雞唱斷覺來樓殿菲微聞
滿目鸞花自零亂平明大駕朝明光坐對百辟言休

祥大臣不敢眩天聽指引六夢多壽張宿齋致禱深
深殿法從依然清晝現玉雲掩映更分明不似昭陽
夢中見千官瞻拜齊驩呼急詔道二丹青圖泥封密
札下江左千門萬戶成須臾撐橫直瞰康廬道驛使
春秋奉宸禱天香祝簡來九重黃袍題封皆御寶龍
樓鳳閣飛雲煙白晝往往策神仙不知卜築歲月遠
但見檜栢高參天年年八月蓮花會奔走江淮貢金
貝惟將正直壓妖氛豈止祈禳致豐歲碧閣萬文噴
驚濤青嶂千疊爭岌堯春雷駭烈蛟蜃變夜醮雜遘
星辰朝吁嗟柱史非虛實故恐誕誇潛曲筆遂令琬

琬失所傳勝事竒蹤散遺逸嘗聞宣子夢鈞天屏息
七日方言還又聞漢武事方術蕙悵清夜來嬋娟遺
方陳迹垂編策千古朝朝甚明白矧茲休驗豈徒然
指數年齡今五百上方至德追唐虞臯夔稷契勤都
俞九夷百越隨指呼幹轉萬化歸神樞禎祥嘉瑞無
時無坐見和氣周綿區餘波流澤施豚魚信哉神語
誠非虛小臣齷齪無嘉謨目覩美應徒嗜噓願傳史
筆令直書留示萬葉永永爲休符

出本宮
舊記

廬山太平興國宮採訪真君事實卷之一

廬山太平興國宮採訪真君事實卷之二

宋朝崇奉類

春秋國醮

太平興國三年四月九日准勅江州

九天採訪使者可每年二月十五日八月十五日係
春秋兩節各致一祭當年七月初十日江州申奏齋
儀禮物開建道場三日滿散設醮三百六十分青詞
朱表係學士院降到今本州永爲定式三年郊祀禮
畢遣中使齋御名青詞朱表建道場五日設醮謝恩

醮意青詞

維年月日

嗣天子臣

御名

謹以節屆仲春遣某官於江州廬山太

平興國宮開啓春秋祭

九天採訪應元保運妙化助順真君靈寶道場三日
兩夜滿散設醮三百六十分位以用和天安地保國
寧邦俯為天下生靈禳災祈福謹上啓

九天採訪應元保運妙化助順真君伏以真境粹清
高穹杳邈苟精誠之不息諒降鑒以非遙獲以眇躬
祇膺景命每慚涼德嗣守丕圖適丁隆盛之時益荷
高明之貺眷茲福地久峙殊庭屬屆仲春式陳常典

况琳宮之宏啓冀靈馭之俯臨察于恭恪之誠享茲
蠲潔之薦俯回洪造申錫嘉祥然後願邦社諸休車
書混一民躋富壽運洽隆平仰冀高空普垂至既無
任懇禱之至謹詞

滿散醮詞

區宇泰寧蒼黔富壽荷高穹之降鑒致純嘏之存臻
節屆仲春禮伸感紀是以凝神碧落著念仙都三日
齋居以時朝奏適屬瓊詞告徹金磬停音更露丹衷
嚴伸清醮伏冀垂休羣物錫羨宗祊疢癘聿消車書
混一百穀保順成之美四時無愆亢之災永賴真休

長依景貺無任懇禱之至謹詞

內降郊祀禮畢青詞

吉日備儀薦明禋而享帝湛恩敷令均純嘏以惠民
時維秩禮之行允賴羣靈之貺肅陳淨醮祗罄潔誠
惟冀神聰式垂冲鑒

內降郊祀禮畢朱表

明禋郊祀昭受帝休賴神助之介成肅祭容而協禮
具嚴馨薦恭接真科冀誠意之潛孚格靈神而不佑

宣賜濕香

大中祥符元年六月二十九日准勅訪聞江州廬山

太平興國觀缺好香供燒可於翰林院歲破濕香三
百斤付本觀逐日於諸殿堂及兩廊焚燒供養

蠲免稅賦

大中祥符二年十月十六日准中書門下牒江州廬
山太平興國觀見納夏秋二稅等牒奉勅並特與除
放充本觀常住仍仰本州檢校分明上曆支用

賜金寶牌

天禧元年九月日奉勅修玉清昭應宮成特賜
聖祖天尊大帝神化金寶牌一所於江州廬山太平
興國觀奉安供養歲度道士一員掌管

進應元保運號詔

元豐四年正月日詔曰運妙用跨太虛高極於九霄
遠際於八表巡遊上下博觀廣察是惟江州廬山太
平興國觀

九天採訪使者蓋天之貴神與世為福然隆名徽稱
歷代置而不講甚非所以答神明之意可進號

九天採訪應元保運真君庶幾導殊祥獲嘉氣以蒙
覆生民焉故茲詔示想宜知悉

先是元豐二年本觀道士陶智仙治舍基於地中
得土金封緘甚固破之皆五色土有銅錢一其文
曰應元保運四字當時周測至四年遣內侍廖維
齋詔及御書殿額來賜及與錢文符合時知制誥

熊本提舉太平興國觀及本觀主首究問得實即
以其錢付廖維表獻迎牌至觀之夕直殿道士吳
有終等聞仙樂之聲驚走
開殿即止其靈異如此

祭告祝版

陟降上下高窮於九霄周遊巡行旁際於八極鑒觀
有度善惡無差美報未豐隆名久缺爰通精意肅進
徽稱庶俾黎元永膺福祉

醮慶進號青詞

道妙太虛化馳八極恭承庇佑積仰靈光冀崇顯於
上真乃加隆於懿號爛然寶字揭著重簷就袂齋壇
嚴陳淨供庶延颺馭下貫琳宮

向前朱表

臣名言薦號高真揭題祕殿就陳淨供備致潔誠敢
不藏在昔神考嚴恭寅畏明德恤祀帝用居歆百神
受職發揚丕貺肇進徽稱謂其顯仁利用兆於有形
之始故曰應元錫羨降康成是無疆之休故曰保運
勅書扁榜奎壁粲然霞衣綵幢金碧焜耀而典冊未
備屬在後人肆惟菲德紹休聖緒噫惟大道是興惟
前烈是承鋪張景鑠刊鏤嘉玉具舉緝禮繼述先志
伏惟精誠所嚮符應昭荅孚佑眇躬膺受多福相我
有邦億萬斯年惟時報事其永無斁謹言

奏告詞

至人無迹大道難名爰即舊稱肇刊新冊遠馳使傳
祇告真宮勅太卜以消辰命有司而備禮仰祈靈鑒
俯照丹誠享茲久闕之儀錫以無疆之慶

祭告詞

妙道格天休功被物炳為靈耀可得形容祇奉徽稱
式嚴報禮消誠斯在昭鑒惟時

奉上行禮詞

職典欽崇敢替靈承之義誠交肸蠁宜殫昭報之文
肆肇舉於徽章用恪伸於寅奉仰祈歆答永介休祥

滿散詞

至神無象雖莫能名盛德在人姑從所示式哀顯蹟
肇薦徽稱冀享褒崇永綏福祉

滿散朱表

祇奉高真肇揚顯冊瞻太霄而在望被靈宇以伸虔
善利所加既作黎元之福純禧來被更延景曆之昌

奉安玉冊醮開啓文

廬峯秀拔儼仙聖之真祠寶冊肇新煥熙辰之盛典
初屬禮成之慶敢伸妙供之修普洽輿情仰伸誠祝
伏願至神昭格洞鑒冥符萬壽無疆恢帝國之廣大

三時不害永民物之阜康

滿散詞

惟廬嶽之名峯實天仙之奧宅夢符晝現雖自開元
之傳迹遠名彰邈想真王之始應世則帝王之佐在
天惟耳目之司千齡昔紀於元豐四字首加於徽號
備茲縉禮屬在休期鏤玉填金煥成章於雲漢臨軒
發冊增偉觀於江山顧熙事之嘉成涓良辰而祝告
伏願威神臨格昭鑒居歆薰燎揭虔共仰九霄之邃
龐鴻隤祉永言萬壽之期併敷錫於庶民俾交欣於
百樂

改觀爲宮

宣和六年七月二十七日御筆改觀爲宮給事中王
易簡奏乞降御書牌額遂賜御書曰太平興國之宮

是時迎奉御書牌江行至太平州謝家灣有順濟
龍王登舟現金鱗玉爪長尺餘盤旋花枝之上護
舟至池陽清溪有水獸三四昂首呼鳴龍王自船
中引首顧之池州官民瞻拜忽爾不見○戒途之
初預卜吉日建醮本宮沿途阻風將失期限忽在
真州遇順風半月之程數日而至到岸則風逆如
初預期不爽衆皆
異之出異錄記

保禳祝版

維紹興三十一年辛巳十二月己亥朔十七日乙卯
嗣天子臣某近爲邊鄙繹騷朝廷用兵乞賜陰助掃

除妖孽以速萬全謹遣右承議郎通判江州軍州事
臣鄭建中敢昭告于

九天採訪應元保運真君伏以國家祗奉神祇載在
祀典春秋時享罔敢不飭欽惟

明靈密垂護佑蠢茲妖孽犯我邊疆爰整王師正繫
神助掃蕩邊氛亟臻清平嘉與含生躋于仁壽尚饗

韋太后殿設醮兩座

第一醮意

皇太后妾韋氏謹齋十方鎮綵本命文繒詣江州太
平興國宮

九天採訪應元保運真君殿普集道士一壇於八月
七日宿建

太上順天興國寶壇修奉

無上大羅玄都玉京紫微上宮三元玉錄道場三晝
夜滿散脩設普天大醮三千六百分延奉

高真用祝聖壽無疆皇圖永固萬民樂業五穀豐登
次冀妾齒堅日明身強體健皇后吳氏宮闈崇慶枝
葉繁昌

第一醮詞

祗承道蔭敢妄昭事之心仰扣天闈特靈忱恂之懇

伏念妾篤生聖主慶集慈闈年踰中壽之高日備懼
心之養荷上帝之眷顧撫小已以戰兢迺捐脂澤之
餘恭款琳宮之邃謹遵靈式用答微誠三千六百分
之周天斬冲霄之下鑒一千二百歲之眉壽續太上
之脩齡中宮受滋至之休聖子神孫之千億老身備
康寧之福日視耳聽之聰明更酌餘波回沾率土歲
有豐登之瑞人無疢癘之憂諒鑒丹衷儻垂洪佑

第二醮意同前

第二醮詞

精白一心不避再三之告穹蒼萬里必蒙降鑒之明

伏念妾誕育聖躬宅尊官壺享萬國歡心之養實九
清垂祐之私迺捐服用之餘資祗款仙靈之祕宇輒
伸悃幅少荅生成恭演真科聖位十周天之度用增
睿筭神人三嵩嶽之呼椒房應夢日之祥晚景續如
川之壽更資道蔭廣被羣生師混元之人早契飛昇
之妙樂瞿曇之士速登圓覺之門四時有玉燭之調
百穀獲金穰之兆惟大圓之從欲遂小已之陳辭不
勝依歸諒垂昭鑒

保邊祝版

隆興二年歲次甲申十一月壬午朔二十八日己酉

嗣天子臣某伏爲邊鄙敕寧朝廷用兵乞賜陰助謹
遣降授左朝散大夫敷文閣待制知江州軍州事賜
紫金魚袋臣唐文若敢昭薦于太平興國宮

九天採訪應元保運真君伏以妖孽侵邊尚肆虔劉
之虐師徒駐野未收攘却之功敢布忱誠仰干英鑒
冀靈威之佑助無妖祲之結蟠尚饗

賜靈澤龍廟額

嘉泰四年正月準尚書省牒禮部狀準都省批下江
西轉運使司狀據江州申據德化縣申據管屬進士
劉揆等竊見太平興國宮宮後三山澗龍潭遠近百

姓祈求雨澤感應顯著前政知州王容在任兩年遇旱祈禱雨澤隨降嘉泰元年六月不雨本州遂委本縣主簿常權躬詣龍潭迎請聖水奉安設廳醮未畢兩大作稿苗泐興歲成大稔本州遂於龍潭建立廟祠崇奉乞封爵廟額本司委興國軍永興縣丞上官世勳躬親詢究再委隆興府奉新縣主簿孫仁覆實上件靈蹟委有恩惠澤及生民保明詣實伏候勅旨後批送部勘當申尚書省尋行下太常寺勘當去後據申檢準建炎三年正月六日已降指揮節文神祠遇有靈應即先賜額并淳熙十四年六月十九日已

降指揮節文今後神祠祈禱應驗令諸路運司依條保奏取旨加封本寺照得今來本路轉運司已依條差官詢究覆實保奏了當應得加封條法今勘當乞從已降指揮合先賜廟額合行降勅伏乞省部備中朝廷取旨加封施行申部本部今勘當欲從太常寺勘當到事理施行伏候指揮奉勅宜賜靈澤廟爲額

保國祈嗣玉簡

維嘉熙元年歲次丁酉十月己卯朔十五日癸巳

嗣天子臣某伏爲保延國祚恭祈嗣續敬齋香信祇建冲科命道士二十一員於江州太平興國宮啓建

靈寶道場一晝二夜滿散設醮三百六十分位告盟
天地誕集嘉祥謹依舊式詣

九天採訪應元保運真君殿下投送金龍玉簡欲冀
至聖至真鑒此丹悃乞爲騰奏上聞九天臣伏以元
儲虛位未開熊夢之祥邊悃分屯尚調虎符之戍內
欲隆於國本外思靖於兵氛仰惟祖宗積累之難深
切朝夕繼承之懼是用肆類上帝徧禱名山願垂覆
燾之仁宏賜扶持之力得男而應震索茂延百世之
期偃武而致太平坐底四方之治保基圖於鞏固措
民物於救寧祗迓靈休永依大道臣某無任懇禱之

至

陳乞加封奏狀

臣熊守中謹瀝愚衷仰干天聽退思僭越甘伏典刑
竊念臣山林灰槁雲水篔簹瓢身與世以漂流志因時
而感激伏睹江州廬山

九天採訪應元保運真君上自三皇五帝下至于唐
逐代易名顯靈降祉主天地國家之歷數掌祖宗儲
嗣之符圖在昔賜額撥田褒封祈禱具有成典至於
禳禱水旱弭戢兵戈應感靈驗載諸碑記真君顯靈
之初有語曰後五百年福及生靈保安國祚揆今五

百八年無有以徹淵聽者重念臣本儒家子父命入
山蒙恩服羽奉真君香火餘五十年誤叨住持以來
剔蠹革弊一新福庭表率羽流祝延聖壽凡歲之豐
凶民之疾苦夙夜齋心精白祈禱務求感應仰贊明
時臣雖非官守言責者比而憂國愛君出於天性敢
致叩閣之請庸疇戀闕之心謹纂集廬山古碑舊記
所載九天採訪應元保運真君在本朝靈驗事跡彰
彰在人耳目者編次爲六一曰朔始源流二曰宅靈
始末三曰崇奉彛則四曰褒嘉典故五曰像設儀制
六曰感應靈異繕寫爲一冊用黃羅囊封隨狀上進
伏望陛下少賜采覽體祖宗崇信之意爲社稷靈長
之謀遵故事於往時舉曠儀於今日應元有自復太
平興國之風保運無窮叶壽富多男之祝皇圖鞏固
邊陲澄清臣不避鼎鑊之誅謹具奏聞俯伏闕庭伏
望聖慈特賜睿旨付尚書省檢尋舊規加封真君徽
號降香廬山太平興國宮設醮陳詞禳兵弭寇以應
五百年福及生靈之運丕衍億萬載無疆之休臣冒
犯天威罪當萬死謹錄奏聞伏候勅旨

嘉熙二年八月日新廬山太平興國宮前侍智兼管轄龍守中狀奏

醮旨

嗣天子臣某伏爲家國少寧邊陲侵擾師徒久戍未
收攘却之功宵旰靡寧敢怠禱祈之請謹遣上清太
洞經籙道士熊守中齋香信詣廬山太平興國宮開
壇歲事拜伏寶章上通宸極以用禳兵弭寇保國寧
邦欽惟

九天採訪應元保運真君開治廬山之始預祈國祚
之安五百年福及生靈適當此數億萬載垂休宗社
克保將來伏願九天助順三境昭臨消禍亂以康時
弭干戈於不戰更冀雨暘時若年穀豐登萬民無疵
癘之災四海樂昇平之化

上帝青詞

皇天無親固惟德而是輔至道有要必自誠之可通
爰命羽流虔伸丹悃邊陲驚擾烽燧因仍內貽宵旰
之憂外積干戈之慘薦蘋蘩而請禱望穹昊以據誠
伏願天道宜還人心從欲俯回洪造溥施下濟之仁
申命真司盡被好生之德

真君青詞

嗣守丕圖昧攸司之疎曠適丁多事駭成典之昭彰
爰命羽流旋申祀事十三帝尊崇繕禮豈不偉哉五
百年福及生靈今其時矣誓堅香火永答神休兵革

侵疆師徒駐野四蜀長淮之慘酷痛徹此心九州率
土之威儀合歸中國恭惟

九天祿訪應元保運真君闡至靈於前古隆徽號於
本朝當瑞命之應期符生靈之積望雷行號令速掃
妖氛日扇祥風將安善類

加封誥詞

中書門下省禮部狀準嘉熙四年四月十四日勅節
文尚書省送到禮部狀準都省批下禮部申準嘉熙
三年九月二日都省批下江州太平興國宮前管轄
住持知宮事熊守中劄子陳乞

九天採訪應元保運真君加封設醮及乞頒降御書
三清閣三字事後批升進冊送禮部勘當中尚書省
本部尋連送太常寺勘當去後據本寺申照得熊守
中所陳真君事迹自唐以來多著靈異至我朝神廟
始進號為

九天採訪應元保運真君列聖欽崇有加無替施詳
進冊鋪叙六門其啓輝發祥標符顯應固非其他神
祠可比至若水旱疾疫之災盜賊兵革之變隨事切
禱響答影從真有助於國家有功於生靈也增隆徽
號用侈殊褒其加封一節欲照所乞申取行下以憑

擬定欲具檢申呈奉批判行伏乞省部備申朝廷知
從今來熊守中所乞事理候批今狀下日行下本寺
以憑加封施行更合取自指揮施行并進冊繳連見
到申部本部所據太常寺申到事理備錄在前本部
照得今來熊守中所乞真君事跡加封如蒙朝廷許
從太常寺申到事理候批今狀下部行下太常寺以
憑加封施行伏候指揮後批并冊送禮部從勘當到
事理施行本部尋連送太常寺遵從都省批狀指揮
施行去後令據太常寺申本寺今遵從都省批狀指
揮欲於應元保運字下加二字今欲擬

九天採訪應元保運妙化真君合命詞給誥伏乞省
部備申朝廷取旨加封施行申部本部所據太常寺
申到事理備錄在前伏乞朝廷指揮施行伏候指揮
四月八日奉聖旨依本部尋取到太常寺供到前
後擬伏乞朝廷命詞給誥施行伏候指揮奉勅朕寅
事上帝懷柔百神矧惟仙品之高夙紀道書之秘三
山鼎立雖肇跡於有唐一氣胚涵本儲靈於太始嶽
瀆並歸於主宰國家允賴於保綏遙企真風肆加美
謚

九天採訪應元保運真君體道爲用入有出無象帝

之先莫知誰子御炁之辯以遊無窮嘗受命於璇霄
來宅靈於廬阜惟九霄品秩孰如採訪之尊會三界
天人皆屬統臨之大自熙陵以太平興國而易觀額
至

神廟進應元保運仍揭宮名昭回雲漢之光焜耀朱
陵之府肆朕纘服率循舊章春秋醮祭之聿嚴水旱
禴禘而必應闕羽衣之驛奏想鶴駕之騰遊用舉徽
稱式彰妙化七千劫初分於元景未易強名五百年
流福於生靈適逢休會諒上蒼悔禍之有日而四海
息兵之可期佑我丕圖永綏景福可特封

九天採訪應元保運妙化真君

廬山太平興國宮採訪真君事實卷之二

國

卷二

七

